

宋代詔令全集

學術顧問 曾棗莊 劉琳
主編 王智勇 王蓉貴

第十冊



四川大學出版社

本書出版得到國家古籍整理出版專項經費資助
國家「二一」工程重點學科建設項目
四川省哲學社會科學「十五」研究項目

宋代詔令全集

主編 王智勇 王蓉貴

第十冊



四川大學出版社

宋代詔令全集卷五二三

典禮

明堂

赦文 三

明堂赦文^(一)

在法，大保長一年替，保正、小保長並二年替，若陳訴元差不當所屬，限一月與奪。訪聞縣道往往不照條法定差，及致陳訴，又不照條限與奪，及將合滿替人羈留在縣，比較界內官物，至有積欠，亦責令催理，不能脫免，以致破蕩家業，深可憐憫。仰自今後須管知佐聚廳照應條法，從公定差。若或陳訴不當，亦仰照限與奪。如遇合滿替日，不得羈留在縣比較及催理官物。仍仰提舉司常切覺察，如違，許人戶越訴。《宋會要輯稿》食貨六六之二八。

明堂赦文

開禧二年九月十三日

應命官管押綱運，偶緣元差官司失於照應，致有年及六十以上，或無舉主，未曾到部，及課利場務監官并有進納雜流，與夫特奏名并差別路官管押，或陳乞釐革之人，但所押錢物別無少欠，見礙推賞，可特與放行一次。《宋會要輯稿》職官八之五八。

守闕進義副尉至下班祇應，立到一十三處戰功之人，已有節次指揮赦文，放行添差恩例任數，注授諸州軍添置聽候使喚，支破全分請給。其間有因前項戰功補授守闕進勇副尉名目之人，未有該載，理宜甄別。可將似此之人照應已降赦文，放行恩例任數，與副尉下班祇應衮同注授，添置使喚員闕，支破全分請給。

諸軍從軍揀汰守闕進義副尉、進勇副尉內有曾經捍禦待敵、出戍暴露，比拍事藝補授之人，自來未許參注，理合優卹，可令兵部於存留散祇候六十闕內，將似此之人衮同差注施行。以上《宋會要輯稿》職官一四之一七。

淮浙鹽倉場收買鹽貨，多是大秤斤重，少支價錢，却將寬剩鹽數妄作亭戶人中支請官錢分受人己，令提舉司檢坐元降指揮行下禁載。《宋會要輯稿》食貨二八之五一。

明堂赦文

嘉定二年九月十日

淮民乍離兵革，飢饉荐臻，全藉客人運到米麥及竹木等爲續食營造之計，訪聞所過州縣暴征苛取，遂致商賈不行。自今客舟如往兩淮興販，所過場務米麥不得收稅，所帶竹木與免抽解，仍不得巧作名色，多取稅錢。《宋會要輯稿》食貨一八之二四。

訪聞諸路州縣人戶已納稅租，其本縣又行出給標子，重疊追取。人戶爲見錢數不多，又復送納，其所出標子又須用錢申繳，

(二)

按原書載此文爲「嘉泰□年九月十八日明堂赦文」，然嘉泰年間無明堂祀。考兩宋祀明堂在九月十八日者只有紹興元年及慶元六年二次。《宋會要輯稿》編此條於慶元三年條之後，嘉泰四年條之前，則應是慶元六年事。

顯屬騷擾。如有似此去處，仰逐州守臣常切覺察，重作施行，許被擾人戶越訴。

勘會人戶夏稅和買紬絹，內紬合納本色二分，折帛錢八分，絹合納本色七分，折帛三分。訪聞州縣却侵本色分數，多數折帛價錢；又有折納銀兩，及將人戶有合納會子分數，抑令並納見錢，重困民力。委轉運司常切覺察，多切文榜曉示，如有違戾，即行按劾，仍許人戶越訴。以上《宋會要輯稿》食貨六八之一九。

明堂赦文

嘉定八年九月十五日

諸軍揀汰離軍曾經立功重殘廢之人，朝廷優恤，不以付身圓與不圓，乾道八年、淳熙元年、慶元三年、開禧二年、嘉定八年五次各與添差，自後別無再行恩數。竊慮狼狽，可將似此添差五任已滿之人更與添差一次。

昨因臣僚奏請，不許離軍揀汰使臣作保參選，專爲冒名承代之人，其離軍揀汰使臣、校尉到部，尚慮一例阻節，各許召本色保參選注授。

知縣、縣令放罷後到部，從已降指揮，不許注繁難大縣及選闕知縣、縣令，止許注小縣并中縣、下縣知縣、縣令。似此之人，如該令赦，令吏部開具元犯申尚書省，酌量事理輕重〔一〕，除不許注授繁難大縣及選闕外，特許注授見榜上縣并未應出闕中縣、下縣知縣、縣令一次。

應衝替命官係事理重者，與減作稍重，稍重者減作輕，輕者與差遣，差替放罷者依無過人例。使臣比類施行。其緣公犯罪衝替，重降作輕，稍重者與本等差遣。以上《宋會要輯稿》職官八之

六六。

諸軍從軍揀汰守闕進義副尉、進勇副尉，內有曾經捍禦待敵、出戍暴露、比拍事藝補授之人，自來未許參注，理合優卹。可令兵部於存留散祇候八十闕內，將似此之人衮同差注，及有攝進勇副尉、同進勇副尉係在守闕進勇副尉之人，其間或有似此前項補授之人，可並許於上項存留闕內一體差注施行。

諸軍揀汰離軍下班祇應，內有曾經立到一十三處戰功之人，已降指揮，許添差諸州軍添置聽候使喚，不釐務差遣。可將副尉照應下班祇應節次已降指揮，放行添置差遣，仍衮同注授塞闕，即不過立定元額之數。守闕進義副尉準此。以上《宋會要輯稿》職官一四之一九。

明堂赦文

嘉定十一年九月十二日

勘會命官所得酬賞〔二〕，在任公罪降官不因本職，或得替後被罷，行下約得刑名，係是公罪杖以下，該遇令赦，合依無過人例，特與照數放行一次。

在法，命官陳乞磨勘服色年限，內曾因罪編羈管、勒停、責授敕官、追官或居住，若除名後雖已改正過名，而無理元斷月日之文，其以前被罪年月並不許收使外，節次官司引用不明。自今後命官被罪以後至改正之前年月，並不許收使，其未被罪以前歷過年月係是未有罪犯，合與放行。以上《宋會要輯稿》職官八之六七。

〔一〕輕：原作「經」，據文意改。

〔二〕勘：原作「勸」，據文意改。

明堂赦文

嘉定十四年九月十日

勘會知縣、縣令放罷後到部，從已降指揮，不許差注繁難大縣及選闕知縣、縣令，止許注小縣并中縣、下縣知縣、縣令。似此之人，如該今赦，令吏部開具元犯申尚書省，酌量事理輕重，除不許注授繁難大縣及選闕外，特許注授見榜上縣并未應出闕中下縣知縣、縣令一次。《宋會要輯稿》職官四八之五一。

勘會見在部待次不得與親民差遣人，該遇今赦，令吏部開具元犯申尚書省〔二〕，酌量事理輕重，特與注授小軍州簽判及遠小縣縣丞一次，如犯在赦後，依已降指揮施行。《宋會要輯稿》職官八之六七。

諸路州軍折欠米料，已將管押人并綱梢等押下原發去處陪填。其間有委非侵盜者，可將見次人特與放免一百石，餘數依條監理，其不及一百石者，並與蠲放。及起發行在米料綱梢等人，因有折欠數目，□押下元起綱州軍填納，監繫日久，截自嘉定十三年終，有只欠二十石以下者，亦蠲放。

嘉定十一年至今赦前，間有早傷州縣取撥椿管米斛賑濟賑糴，因般剩欠少，見將管押人并綱梢等監繫陪填，可令提舉司覈實，委非侵盜，將未足之數並與放免。以上《宋會要輯稿》食貨四四之二〇。

斬、黃州并管下縣鎮有曾經兵火驚擾去處，致使人戶逃徙，無家可歸，理宜矜恤。令淮西制置司行下州縣，遇有歸業無屋存泊之人，即聽從便踏逐係官屋宇及寺觀安泊，毋致失所，仍多出文榜曉諭。《宋會要輯稿》食貨五八之三三。

州縣役錢逐年均數，皆有定數，訪聞諸路提舉常平司却以餘剩爲名，抑令縣道添認作餘剩錢解發公庫，以資妄用。縣道無所從出，不免科配於民，委是違法，合行禁約。如有違戾，許監司互察，仍令人戶越訴。《宋會要輯稿》食貨六八之二六。

諸路州縣不依條限，推排人戶物力，是致家業並無陞降。其間有產去稅存之家，官司止據舊數催理官物，雖有逃亡，猶掛欠籍。可令知通、令佐究實除放，仍令提舉司常切督責州縣照應條限，從實推排，毋致違戾。《宋會要輯稿》食貨六九之三三。

朝廷行下諸路州軍收買軍需之物，並係支降合撥窠名錢給還，切慮諸路州不即支還價錢，妄行科擾。仰州縣常切遵守，毋致違戾，如違，仰監司按劾以聞。

戶部每年行下逐州，委官收買大軍支遣綿絹，係先截撥綱運上供諸色窠名錢照市價收買，仍免除頭子錢，已是詳盡，尚慮州郡將已截綱運官錢占吝在州，抑勒民戶、牙僧先次買發，止支些小價錢，妄以未曾截撥爲名，遷延歲月，更不盡數支給。自今赦下日，如有似此未支錢數，仰人戶徑經戶部陳訴，將未支數目行下本處，日下一併支還，仍將當職官吏按治施行。

諸路監司并二廣州郡合發進奉聖節及大禮銀絹，在法合以係省錢收買。今聞諸處科抑民間買納，委是違戾，仰諸路監下聞。以上《宋會要輯稿》食貨六七之二。

勘會漳、泉、福、興化四郡瀕海，細民以漁爲業，所得其實無幾，州縣官吏不恤，却行征取。自今赦到日，仰本路轉運提刑

〔二〕 省：原脫，徑補。

司常切覺察，如州縣仍前違戾，按劾聞奏。

勘會諸縣起解本州及上司財賦，如糴本錢、牙契錢、忠順官錢、經總制錢之類，各有立定窠名。訪問諸州軍不恤縣道，逐時添立項目錢數，遂爲永額，可令日下改正。或有違戾，仰監司覺察，按劾以聞。

勘會保正副依條止掌烟火、盜賊、橋道等事，訪問官司動用，一切取辦，如修葺材料，差顧夫力，勒令催科，並是違法，仰今後州縣遵守條令，不得汎有科擾。如違，許充役之家越訴，仍仰監司覺察，按劾聞奏。以上《宋會要輯稿》刑法二之一四四。

應有犯罪除從條合行編管，并情理重害及曾經奏斷特旨施行外，其餘或因州軍一時任意非法編管人，自今赦到日，仰提刑司取索元犯看詳，如見得情理稍輕，給據放令逐便。《宋會要輯稿》刑法四之六七。

嘉定五年三月十三日指揮，行下諸路州軍，常切檢視禁軍營屋，如有傾壞，隨即修治。竊慮州縣視爲文具，不與修葺，仰守臣常切差官檢視，歲具修過數目申安撫司照會。如違，許安撫司覺察聞奏。其諸處屯戍軍兵營屋，仰主帥一體施行。《宋會要輯稿》兵六之三〇。

應命官合得捕盜賞，或因臣僚論奏繳駁小節不圓，一時阻滯，未曾放行。除非贓私罪犯之人，可令吏部契勘具申尚書省，特與斟酌放行一次。《宋會要輯稿》兵一三之四九。

明堂赦文

端平三年九月十七日辛未〔一〕

朕嗣宅丕后，保綏受民。上帝臨汝，無貳爾心，敢不盡靈承

之事？先王惟時，懋敬厥德，未嘗忘裸饗之忱。每夙夜以惟勤，庶神天之克典。顧德不類，遭時多艱，兵氛未澄，星紀弗靜。京畿邦之根本，而淫雨害於棗盛；漢峴國之咽喉，而蝨賊搖我邊鄙。戰士被介胄不得卧，丁夫罷轉餉不得休。瘼茲下民，靡所寧宇。念天地以好生爲德，徧覆包含而無殊；而祖宗以兼愛爲仁，聰明神武而不殺。豈親接三才之奧，亡哀矜庶獄之心？蓋嘗以干戈省厥躬，以侵象救其政。雖承宇之霏開霽，未還時和歲稔之風；雖侵疆之騎倏回，寧保地淨冰寒之日？若匪籲蒼旻而潔告，其何措方夏於阜安！爰刺六經之文，更規五室之制。有秩禮囿，有嚴頌堂。奉牲以告不在牲，而在民力之普存；更幣以祈不惟幣，而惟國用之均節。憑至誠之洞屬，薦明德之馨香。於是登彝闕宮，奠璧清廟，夙駕齋輅，親祠總章。袞龍作繪而五采施，錙玉鳴詩而九歌應。多士顯相，陟降在庭；百工倅從，左右厥辟。瞻和氣之薰浹，儼神光之陸離。豈惟鐘皗皗，筦鏘鏘；如見旗容容，騎沓沓。蓋上天日監王者之處，曾咫尺之不違，而庶民是近天子之光，宜始終之若保。既荷靈娛之來燕，豈應餒惠之不均？乃御端闈，式盼大號。嘉與函生之衆，共迎景貺之新。於戲！崇《周官》九尺之筵，精意已通於胎蟹；肆《呂命》五刑之赦，湛恩斯徧於埏埴。尚賴奮庸亮采之臣，秉德陪祠之彥，烈文羣辟，孔武六師，永肩勵翼之忠，宏濟不平之業。《鶴林集》卷五。

〔一〕年月日據《宋史》卷四二《理宗紀》二補。

【赦文內容】

《宋史》卷一八五《食貨志》下七：「諸路州縣阮治興發，在觀寺、祠廟、公宇、居民墳地及近墳園林地者，在法不許人告，亦不得受理。訪聞官司利於告發，更不究實，多致擾害。自今許人戶越訴，官吏并訟者重置典憲，及有阮治停閉、苗脉不發之所，州縣勒令阮戶虛認歲額，提點鑄錢司覈實追正。」

明堂赦文

淳祐二年九月十二日

四川累經兵火，百姓棄業避難，官以其曠土權耕屯以給軍食，及民歸業，占據不還。自今凡民有契券，界至分明，所在州縣屯官隨即歸還。其有違戾，許民越訴，重罪之。《宋史》卷一七三《食貨志》上。

明堂大禮赦文

淳祐十一年九月十四日辛未〔一〕

朕以涼非之資，守延洪之業。紹天明命，亦惟遺大投艱；在昔哲王，罔不明德恤祀〔二〕。纂承滋久〔三〕，寅畏靡忘。聞太史妖祥之占〔四〕，疚懷脩省；覽四方水旱之奏，由己溺饑。荷二儀之顧歆，與列聖之積累，嚴守備以驅蚊虻之害〔五〕，務安集以奠鴻鴈之居。雲中赤白之囊，適稀驚報〔六〕；都內腐紅之粟，粗有宿儲。欲寢兵措刑而未能，念制治保邦之匪易〔七〕，徒以小心而對越，尤於大享以欽崇。陳太常玉路之儀，森萬騎羽林之衛。在宮在廟，叶周家雝肅之詩；於帝於宗，采虞氏類禋之典。一純二

精之義得，合法參侑之禮行。祭以茅苴，馨非黍稷。詔除秘祝，鄉於己者敢專〔八〕；史布正辭，質諸神而無愧。景光燭而靈游沛〔九〕，燎煙升而精浸交。熙事乃成，至和斯應。奏《我將》之頌而受嘏，既介蕃禧；歛《洪範》之福以錫民，聿稽古誼。鳴蹕而御丹鳳，肆眚而揭金鷄。嘉與含生，均蒙餽惠。可大赦天下。

尾 詞

於戲！一夫不獲其所，實切於恫瘝；百姓有過在予，悉從於曠蕩。尚賴同心一德之輔，宣力四方之臣。坐而論者，益推於上恩；作而行者，勿視以文具。協圖康乂，哀對洪休〔一〇〕。《後村先生大全集》卷五三。

明堂赦文

景定元年九月十六日

監司、州縣不許非法估籍民產，戒非不嚴，而貪官暴吏，往往不問所犯輕重，不顧同居有分財產，壹例估籍，殃及平民。或

- 〔一〕 九月十四日辛未：原無，據《宋史》卷四三《理宗紀》補。
- 〔二〕 恤祀：原作「纂祀」，據翁同書校秦氏石硯齋抄本改。
- 〔三〕 纂：原無，據翁同書校秦氏石硯齋抄本補。
- 〔四〕 「聞」下原有「恤」字，據翁同書校秦氏石硯齋抄本刪。
- 〔五〕 驅蚊虻之害：翁同書校秦氏石硯齋抄本改作「重熊羆之任」。
- 〔六〕 驚：似當作「警」。
- 〔七〕 制：似當作「致」。
- 〔八〕 鄉：原作「卿」，據翁同書校秦氏石硯齋抄本改。
- 〔九〕 靈游：似當作「靈狩」。
- 〔一〇〕 洪：原無，據翁同書校秦氏石硯齋抄本補。

戶絕之家不與命繼；或經陳訴許以給還，輒假他名支破，竟成乾沒；或有典業不聽收贖，遂使產主無辜失業。違戾官吏，重寘典憲。《宋史》卷一七三《食貨志》上一。

諸路已糶義米價錢，州郡以低價抑令上戶補糶，正稅逃閭，義米用虧，常平司責縣道陪納，縣道遂敷吏貼、保正長、攬戶等人均納。自今視時收糶，見繫吏貼等人陪納之錢並與除放。《宋史》卷一七六《食貨志》上四。

福建上四州縣倚鹽爲課，其間有招趁失時，月解拖欠，其欠在寶祐五年以前者，並與除放。尚敢違法計口科抑者，監司按劾以聞。《宋史》卷一八三《食貨志》下五。

祀明堂赦文

寅恭宏圖，祇若成憲。稱秩元祀，率先申以蒐儀；於昭明堂，歷吉辛而展采。然禮之大者，非無可稱，而神之格者，惟德是歆。億萬年敬脩之心，秩然咸叙；四十載憂勤之治，常謹持盈。賴兩儀之儲祥，荷列聖之垂祐。陰陽和而物無疵癘，雨暘若而歲比豐登。青海歸疆，咸謳歌於西北；黃旗協道，盛溫厚於東南。方且却遠人之貢，以昭德心；減明年之租，以紓民力。往於攸濟，迄可小康。爾休爾游，當知申命之自；我將我享，益申報本之恩。先一日而致齊，極三日之儼恪。如見所祭，不顯亦臨。款謁真宮，入裸太室。載鸞旗，乘玉輅，匪棘匪徐；披龍袞，執鎮圭，有嚴有翼。乃酌鬱鬯，乃蒞中壇。亞獻芬芳，昭震子之主器；顯維雍穆，萃髦士之奉璋。籩豆靜嘉，羽毛紛盛。美光服貺，衆星留俞。月波日耀之宣明，乾端坤倪之軒豁。加荐

享矣，清明暢矣。維天佑之，福履綏之。緬懷乾德癸亥賜赦之書，順考皇祐季秋肇禋之詔，一以無私之義法天地，一以大公之道服臣民。炯如日月，允矣垂訓。敬其夙夜，奉以畏威。惟熙事之告成，可朕躬之專享。歛時五福，普及萬方，可大赦天下云云。於戲！惟天付予有家，朕必思於兼覆；本朝以仁立國，朕必廣於好生。尚賴輔弼必恭之臣，小大承統之寄，具宣實意，式迓昇平，共躋仁壽。《徐文惠公存稿》卷三。

德祐元年明堂大禮赦文

九月十四日

首詞

門下：朕嗣大曆服，迪前人光。皇天既付中國民，敬事之心敢怠；明堂以教諸侯孝，肆祀之禮有常。惟懷永圖，未堪多難。菲德弗類，上以累三光之明；柄任匪人，下以稔外夷之患。鴻雁哀嗷而靡集，蛇豕薦食以無厭。並告神祇，以與爾衆請命；有指疆土，肆予冲人思艱。恃太母保右之慈，去累歲凶邪之蠱〔一〕，更化而行善政，籲俊以强本朝。黎元之心寢安，將士之氣復振。往求攸濟，曷惠其寧。祈永命惟在德元，敬明神宜無悔怒。念天地好生之初意，畀矜萬邦；而祖宗不殺之至仁，垂裕億載。有嚴大享，其斐忱辭。惟紹興尚質從權，寅毖弭兵之祝；惟淳熙齊精歲事，率循越紉之規。茲收寧圖於武功，乃儀式刑於文典。聿懷在疚之戚，矧當孔棘之秋。肇禋維清，大禮必簡。屏

〔一〕累：原作「屢」，據四庫本、清抄本改。

黼繡周張之飾，優霜露悽愴之思。命輔臣而款真宮，咨宗屬而裸太室。心感通於三才之奧，躬陟格於九几之筵。報本合祛，尊祖并侑。圭幣始薦，屬屬然如弗勝；蕭脂載燭，洋洋乎如在上。牲醴之馨則無譏，粢盛之潔則曰豐穰。秩枯申錫無疆，並貺惟予有慕。月明星概，用格熙成；乾清坤夷，庶克耆定。歸胙介怡愉之壽，肆筵布寬大之條。聰明自民，蓋上帝臨下有赫；恭默思道，謂百姓有過在予。閔征戍之勤勞，惻邊陲之荼毒，汔可少息〔一〕，咸與維新。俾沐膏澤而鏡至清，用開治源而導和氣。可大赦天下。

尾 詞

於戲！皇極敷言，於帝其訓，敢專五福之膺，《我將》既享，畏天之威，永保四方之乂。尚賴股肱咸一德之輔，熊羆不二心之臣，合謀計安，攘狄復境，協成順信之助，丕集升平之勳。

《四明文獻集》卷二。

〔一〕 少：原作「小」，據四庫本、清抄本改。

宋代詔令全集卷五二四

典禮

明堂

冊文祝文青詞表文 一

昊天上帝冊文

伏以乾體純健，博覆纖隱。三光粹明，臨照在下。默定民命，播生四時。臣欽應靈顧，皇建有極，上符陽德，司牧元元。物登季秋，躬修大報。會以五氣，宗祈明堂。承順至尊，精志孚盡。降休右順，維永維寧。《華陽集》卷九。

赤帝冊文

伏以炎德乘離，光明正大。氣常在夏，被於南訛。任養函生，靡不繁祉。疇發我運，赤符感精。於赫會昌，繼孝無極。肅霜零暮，萬物報秋。五室清明，接神之顧。鐘鼓以繹，玉幣以精。既右饗之，敷錫永祚。《華陽集》卷九。

白帝冊文

伏以西方之氣，金精行令。主時肅殺，大歛歲功。黍稷既登，積之栗栗。五室合饗，物與志盡。涼露宵隕，感惻滋至。念

我皇考，昭配於天。禮樂熙明，寧神祚德。以蕃庶彙，以綏烝人。《華陽集》卷九。

明堂禮成奏謝內外諸神御殿表

屬者酌皇祐之典，奉合宮之祠。嘉盛薦芳，美樂象德。誠孝孚盡，休祥顯臻。薦成曠儀，實荷丕蔭。《華陽集》卷一〇。

明堂禮成奏謝名山諸佛表

伏以秋昊晚序，世室宗祈。禮樂具將，神祇昭格。大慈濟力，能事成熙。敢達至忱，以綏鴻施。《華陽集》卷十。

明堂禮成奏謝諸陵表 二道

伏以九筵修配，萬玉相成。孝盡人倫，報明天道。顧守鴻業，薦稽濶文。迨錫壽符，舉欽靈睭。

伏以紹綏寶圖，躬緝大祭。九秋蠲潔，五室會精。鴻儀釋陳，嘉應顯見。惕懷先訓，遂格曠文。維祚之休，曷報之極。《華陽集》卷十。

明堂內中奏告三清玉皇聖祖及諸神御殿表

伏以欽循舊典，包舉上儀。前卜季秋之良，躬陳五府之祀。報物生之大本，佇神監之下臨。垂諒精祈，右成熙事。《華陽集》卷一一。

明堂奏告內中諸神及在京宮觀表

伏以嚴烈考之配，交上臺之歡。迺涓路寢之居，以倣合宮之

制。乘秋季序，秩古遺文。敢薦至忱，期導來祉。《華陽集》卷一。

明堂內中廣聖宮開啟靈寶道場青詞

伏以九清會元，裁總萬化。衆妙宗德，顧右丕圖。季秋肇辰，五室合饗。按錄珍館，飛章太虛。垂錫順祺，涓成熙事。《華陽集》卷一二。

明堂車駕出內前一日奏告景靈宮道場青詞

伏以蠲辰季秋，錯事重宇。餽駕自廟，格薰於天。載達至忱，尚蒙丕施。《華陽集》卷一二。

明堂禮成內中福寧殿罷散恭謝道場青詞

伏以五府之詞，通神合奠。自天降祉，膺于無窮。廣殿四嚴，萬靈來下。至精發德，以謝休成。《華陽集》卷一二。

明堂朝謁景靈宮天興殿聖祖奏告道場青詞

伏以肇錫元符，實基真緒。屬諏辰于商律，載講禮於路廷。夙夜齊興，順祇祕館。薦誠先達，遺祉後延。《華陽集》卷一二。

明堂朝謁景靈宮保寧閣元天大聖后奏告道場青

詞

伏以德載靖柔，功符函厚。奉祠太寢，祇事真廷。仰瞻聖儀，實主陰化。聿陳芳薦，庶格蕃釐。《華陽集》卷一二。

明堂奏告在京諸宮道場青詞

伏以述修曠儀，升成宗祀。內盡饗親之孝，上孚拜帝之休。卜季商之有期，瞻真馭之攸館。式申先告，用格至虔。《華陽集》卷一二。

明堂祭告在京諸神廟祝文

伏以卜秋吉序，講古濶文。極嚴父之孝思，崇事天之美報。乃涓路寢之室，以象合宮之筵。將迓休成，或先敷薦。《華陽集》卷一四。

祭告景靈宮里域真官祝文

伏以霜律戒期，農疇畢務。祠天神于複廟，歆道祖于祕宮。維土有靈，主幽之緯。夙辭顧饗，右成熙明。《華陽集》卷一四。

奏告太廟七室祝文

伏以禮崇嚴配，歲薦親祠。載陳備物之筵，適在班常之室。素秋雲暮，吉日維辛。將事于虔，先期以告。《華陽集》卷一四。

奏告天地社稷祝文

伏以總章之祠，以嚴上帝之配，季秋之吉，以報萬物之成。述稽舊文，圖輯熙事。飾于盡物，告以先期。《華陽集》卷一四。

朝謁景靈宮行禮前一日奏告天地祝文

伏以天之右綏，保有丕命。三歲之報，有豐斯盛。禮文濶

希，包舉宗祀。庶幾能饗，預以詔虔。《華陽集》卷一四。

朝謁景靈宮行宮內動土祭告里域真官祝文

伏以娛神之禮，張幄陳庭。先期度工，飭以興事。敢申嘉薦，幾靈之安。《華陽集》卷一四。

明堂太廟皇后廟奉慈廟雅飾奉告土地祝文

伏以大饗之虔，先薦清廟。庀工稽事，載塗載丹。懼神勿寧，敢肅以告。《華陽集》卷一四。

車駕出內前一日祭告在京諸神廟祝文

伏以夙講潤儀，載嚴宗祀。裸圭格廟，齋蹕按途。幽靈不遐，明福來輔。《華陽集》卷一四。

明堂禮成謝永安陵永昌陵永熙陵永定陵祝文

顧以紹綏寶圖，躬緝大祭。九秋蠲吉，五室會精。鴻儀繹陳，嘉應顯見。惕懷先訓，昭遙曠文。維祚之休，曷報之極！

《華陽集》卷一四。

禮成謝在京諸神祝文

屬者議禮九房，薦誠上帝。靈顧保饗，美祥降綏。輯儀昭前，追孝風下。有懷茲助，靡報不虔。《華陽集》卷一四。

朝謁太廟祭七祠祝文

恭以季秋之吉，萬寶以登，拜況總章，歌切清廟。爰考祝典，幾要靈歆。《華陽集》卷一四。

禮成謝五嶽四瀆祝文

夫有天下者，必有事天之祭，祭不欲數，率三歲而躬行之。今宗祈明堂，不得舉望秩之禮。雖然，禮成熙明，顧匪羣靈之所相乎！有菲之報，維感格之。《華陽集》卷一四。

明堂預告泗州普照明覺大師道場疏

國家躬三歲之祠，會五精之氣。因嚴以教人之孝，反始以爲民之祈。瞻勝迹之有來，濟能仁之無盡。告誠先事，垂保後祥。《華陽集》卷一五。

明堂禮成開啟謝在京諸廟道場疏

考古事帝，感時念親，迄于告成，宣弗違禮。歸大慈而締果，答幽監之助祥。有託至忱，更孚來應。《華陽集》卷一五。

明堂祀聖祖英宗五帝文

聖祖景靈官

伏以至神高邈，大道沖虛，久發真祥，肇開聖緒。顧惟菲德，嗣守成基。惟時仲秋，備物多品，明裡世室，謁款靈祠。寅

念帝先，夙蒙道蔭。式祈純祐，永福黎元。

英宗皇帝

伏以神資英睿，道協高明，潛德宗藩，承暉帝日。憂勞宵旰，罔敢康寧。惟仁御邦，惟武偃革，嘉靖中國，以綏四夷。顧惟眇躬，嗣守丕業，慄慄危懼，若臨冰淵。九月隕霜，明堂肇祀，孝思慘怛，嘉薦芬芳。上帝是祗，五精咸秩。欲報之德，克配於天，聿求多福，宜萬斯年。

青帝

伏以蒼精起歲，木德司春，氣兆東郊，仁昭左聖，施生廣大，致化精微。惟時斂收，品物多旨，繫神之力，在祀有經。藏儀青陽，祗事昭考，庸申報本，祈錫蕃禧。

赤帝

伏以列位紫微，儲精赤制，以德爲火，居夏乘《離》。臨照四方，敷與萬物，啓我炎曆，肇於休符。季秋涓辰，宗祀昭考，百嘉登阜，多品豐盈。煌煌列精，皇祖繇出，敢忘昭報，以永承休。

黑帝

伏以丕宅幽都，實司水德，歸藏萬彙，含養一元。在卦爲《坎》，於時主《復》，成茲歲紀，繫我帝功。時惟秋旻，禮備孝饗，惇宗將禮，世室是稽。帝臨朔方，生物攸賴，秩茲元祀，來

福來歆。

白帝

伏以西顓司辰，白精布化，敷施義氣，旋斡金行，肅殺斂藏。主於成物。季商之月，嘉實惟時，五室奉禋，九州薦味。孝思罔極，神監來宜，昭報歲功，式陳時祀。

黃帝

伏以德配土中，數居天五，其司季夏，其位黃宮，統和四時，含養九德，博厚光大，其益無方。惟月季秋，有事太室，昭升文考，對越上靈。帝臨中壇，禮備多品，敢忘昭報，永錫嘉生。《古靈先生文集》卷一二。

明堂禮畢謝諸陵文

新穀既登^(一)，肅霜爰降，躬修彝典^(二)，大亨合宮。諸福降休^(三)，孚先咸喜，敢忘昭告，以致明誠。《古靈先生文集》卷一二。

永昭永厚陵九月旦表

伏以九月肅霜，慘怛之心斯至；萬物備禮，馨香之薦惟修。恭惟謚號皇帝，至德清明，上居於一氣；鴻仁深厚，下浸於黎

(一) 登：原作「烝」，據四庫本改。

(二) 彝：原作「屢」，據四庫本、傳本改。

(三) 休：原作「收」，據四庫本、傳本改。

元。昭祖武以重光，詒孫謀而有翼。閔惟小子，祇奉成規，敢忘追遠之誠，長保垂休之永。《古靈先生文集》卷一二。

明堂前祭告千里內諸神祠祝文

國家嗣講聖享，禮物具庀。辛月維吉，將展熙事。預孚神聽，宜有以相之。尚饗！《祠部集》卷三四。

明堂奏告太廟入室冊文

元祐四年九月

維元祐四年歲次己巳，九月戊辰朔，十三日庚辰，孝曾孫嗣皇帝臣煦〔一〕，謹遣某官臣某，敢昭告於僖祖文獻睿和皇帝：伏以德厚流光，發祥自遠；子孫萬世，以顯以承。顧惟眇躬，克荷隆構。季秋吉卜，宗祀明堂。前飭攸司，祇嚴裸獻。惟誠克孝，庶或享之。謹以嘉玉、量幣、柔毛、剛鬣、明粢、薌合、薌簋、嘉蔬、嘉薦、清酌，式達至誠。文懿皇后崔氏配，尚饗。《蘇魏公文集》卷二七。

宣祖冊文

宣祖昭武睿聖皇帝：伏以維天之命，有開必先。挺生真人，繼育神聖。文謨武烈，奄有多方。式舉宗祈，載懷祖德。先期備物，用展孝思。有菲惟羞，至誠是達，昭憲皇后杜氏配。《蘇魏公文集》卷二七。

太祖冊文

太祖啓運立極英武睿文神德聖功至明大孝皇帝：伏以運當

五季，天祐下民。上聖膺期，光宅四海。削平多壘，載張皇綱。肆及菲涼，獲承統業。祇循祖武，敢怠時思。享嘗大庭，前期裸獻。遣臣攝事，尚監茲誠。孝惠皇后賀氏，孝明皇后王氏，孝章皇后宋氏配。《蘇魏公文集》卷二七。

太宗冊文

太宗至仁應道神功聖德文武睿烈大明廣孝皇帝：伏以武定天下，文致太平。盛德成功，重規疊矩。子孫承繼，方夏謐寧。時維季秋，霜露既肅。大庭宗祀，清廟告虔。祇薦苾芬，用達誠懇。率禮弗越，維其右之。淑德皇后尹氏，懿德皇后符氏，明德皇后李氏，元德皇后李氏配。《蘇魏公文集》卷二七。

真宗冊文

皇高祖考真宗膺符稽古成功讓德文明武定章聖元孝皇帝：伏以祖宗受命，維皇繼之。禮樂告成，於時備矣。保和戎狄，勤崇岱宗。治道粲然，敷遺後嗣。季秋大享，夙展時思。永言保之，福祿攸降。皇高祖妣章懷皇后潘氏，皇高祖妣章穆皇后郭氏，皇高祖妣章獻明肅皇后劉氏，皇高祖妣章懿皇后李氏配。《蘇魏公文集》卷二七。

仁宗冊文

皇曾祖考仁宗體天法道極功全德神文聖武睿哲明孝皇帝：

〔一〕 煦：原作「名」，徑改。

伏以崇道尚德，持盈守成。四紀君臨，萬方底定。仁霑動植，恩及蠻夷。翼子謀孫，後世永賴。涓卜秋季，祇事上神。薦告宗桃，用嚴孝享。皇曾祖妣慈聖光獻皇后曹氏配。《蘇魏公文集》卷二十七。

英宗冊文

皇祖考英宗體乾膺曆隆功盛德憲文肅武睿神宣孝皇帝：伏以昊天睠命，文祖愛之。至德升聞，萬方歸往。靈承前烈，迄致隆平。適駿有聲，用開厥後。顧惟眇質，獲嗣丕圖，宗祀路庭，陟配昭考。聿嚴薦享，用達衷精。庶幾顧歆，永綏福祿。《蘇魏公文集》卷二十七。

神宗冊文

皇考神宗英文烈武聖孝皇帝：伏以聖德神功，文經武緯，臨御四海，十有九年。修己安民，仁霑恩洽。肆惟寡昧，荷茲燕貽。大享總章，祇修嚴配。先辰薦裸，庶達孝思。《蘇魏公文集》卷二十七。

明堂禮畢奏謝內中諸殿閣三清諸聖等表

伏以歷吉季秋，展祠陽館。躬執珪幣，并享帝親。荷神靈之顧歆，蒙貺施之均溥。永思昭報，敢怠衷精。《蘇魏公文集》卷二十七。

明堂禮畢奏謝內中欽先殿諸帝后表

伏以三歲親祠，國之大事。合宮裡享，月以季秋。祇薦上

神，陟配昭考。竭至誠於備物，祈厚福於黎元。荷天降祥，已事如禮。敢忘翼勵，仰答靈休。《蘇魏公文集》卷二十七。

諸帝后等陵奏謝明堂禮畢表

臣名言：近以季秋仲辛，明堂大享。獲休成於熙事，賴敷祐於明神。言念貽謀，后云先慈，敢忘勵翼。即陵宮而展報，冀冥鑑之丕昭。恭達孝思，永期福祚。《蘇魏公文集》卷二十七。

明堂禮畢奏謝諸陵帝后表

伏以禮行世室，遵嚴父配天之文；澤布寰區，遂協氣祥風之施。實孫謀之燕翼，致熙事之備成。顧惟眇沖，敢忘祇率。式陳薦報，冀達精誠。《蘇魏公文集》卷二十七。

明堂禮畢奏謝內外諸神廟嶽瀆等處表

伏以合神事於內朝，聿嚴宗祀；致燎煙於太一，遂底熙成。荷錫羨之降康，實敷天之蒙福。仰惟靈祐，相此成儀。是馨芳聲，不忘貺施。《蘇魏公文集》卷二十七。

明堂禮畢奏謝內外諸宮觀表

伏以大事在祀，躬展享親之儀；精意曰裡，克遵配帝之典。薦盥云畢，神靈居歆。迄此休成，率繫沖貺。爰致吉蠲之報，永孚穹昊之休。《蘇魏公文集》卷二十七。

明堂前二日於景靈宮保寧閣上下分獻青詞

元祐四年九月

維元祐四年歲次己巳，九月戊辰朔，十二日己卯，嗣皇帝臣名謹遣翰林學士承旨、光祿大夫、知制誥兼侍讀、上護軍、武功郡開國侯、食邑一千二百戶臣蘇某，謹上啓聖祖、上靈、高道、九天司命、保生天尊、大帝六位仙官：伏以涓季秋之仲辛，奉大庭之宗祀。裡類上帝，升配禰宮。敢率祭儀，恭陳薦禮。無任懇倒之至。謹詞。《蘇魏公文集》卷二十七。

在外諸宮觀五嶽四瀆等處開啓謝明堂禮畢道場

青詞 元祐四年

維元祐四年歲次己巳，某月某朔，某日某甲子，嗣天子臣名謹遣某人，請道士某人，於江寧府茅山開啓明堂禮畢道場某日，罷散日設醮一座，二百四十分位。謹上啓元始天尊、太上道君、太一老君、混元上德皇帝：近以宗祀明堂，克配上帝。仰資冲廡，遂底熙成。敢遵科醮之儀，昭達衷精之懇。尚祈道妙，敷祐邦圖。庶臻泰定之祥，永荷清靈之貺。《蘇魏公文集》卷二十七。

在外諸宮觀五嶽四瀆等處罷散明堂禮畢道場朱

表

臣名言：近者殊庭薦鬯，太室升禋，克成帝享之儀，實賴淵宗之膺。禮嚴昭報，誠盡吉蠲。仰依冲妙之功，永祚丕平之運。

《蘇魏公文集》卷二十七。

景靈宮天興殿雅飾了畢開光明奉安奏告聖祖御

容祝文 元祐四年九月

維元祐四年歲次己巳，九月戊辰朔，二十七日甲午，孝曾孫嗣皇帝臣名謹遣昭宣使、和州刺史、內侍省內侍押班臣趙世長，敢昭告於皇高祖考真宗膺符稽古成功讓德文明武定章聖元孝皇帝：伏以靈德在天，豈忘處語；時思有廟，虔奉衣冠。屬增煥於睟儀，冀即安於寧宇。恭陳薦告，永譽燕貽。尚享。《蘇魏公文集》卷二十七。

景靈宮分獻諸帝后祝文 元祐四年九月

維元祐四年歲次己巳，九月戊辰朔，十二日己卯，孝曾孫嗣皇帝臣名謹遣翰林學士、朝奉郎、知制誥、上騎都尉，賜紫金魚袋臣蘇轍，敢昭薦於宣祖昭武睿聖皇帝：伏以講三年之親祀，將享合宮；奉七世之宗祧，式瞻原廟。崇嚴文考，陟配上神。祇薦苾芬，庶殫誠孝。尚享。《蘇魏公文集》卷二十七。

五嶽四瀆等處爲謝明堂禮畢祝文 元祐四年十月

維元祐四年歲次己巳，十月某朔，某日某甲子，皇帝名謹遣某官，敢昭薦於東嶽天齊仁聖帝：近以度堂格廟〔一〕，嚴父配天。克成宗祀之儀，實賴神靈之祐。式修報禮，祇秩祠宮。冀錫純

〔一〕度：原作「虔」，據庫本改。

禧，永庇烝庶。尚享。《蘇魏公文集》卷二七。

五嶽四瀆等處奏謝明堂禮畢祝文

元祐四年

維元祐四年歲次己巳，某月某朔，某甲子，皇帝名謹遣某官，敢昭薦於東嶽天齊仁聖帝：伏以卜吉季秋，肇禋陽館。既成熙事，實賴神休。載款嚴祠，式陳報禮。冀垂歆鑑，永祐黎元。尚享。《蘇魏公文集》卷二七。

皇帝明堂宿齋第一次問太皇太后聖體答書

太皇太后致書于皇帝：祇事總章，竭誠齋宿。上承天以報本，內嚴父以顯親。克慎多儀，永膺繁祉。《樂城集》卷三四。

皇太后答書

皇太后致書於皇帝：國有舊章，禮嚴宗祀。被齋殿幄之祕，和調玉食之精。益慎孝思，以迓純嘏。《樂城集》卷三四。

皇太妃答書

皇太妃致書于皇帝：齋居外朝，躬承大祀。穆然重屋之禔，遡煥乎右坐之嚴。祇率舊章，以承天貺。《樂城集》卷三四。

第二次太皇太后答書

太皇太后致書于皇帝：祀嚴三歲，卜告中辛。既結佩以齋心，將奠玉而致享。克勤陟降，以接明靈。《樂城集》卷三四。

皇太后答書

皇太后致書于皇帝：講禮合宮，祇視上帝。將儀式於文考，以教孝於諸侯。尚慎威儀，以承佑享。《樂城集》卷三四。

皇太妃答書

皇太妃致書于皇帝：上帝降衷，文考升侑。精誠盡於齋宿，進退比於樂文。罔有告勞，以須降福。《樂城集》卷三四。

皇帝謝禮畢太皇太后答書

太皇太后致書于皇帝：奉承天休，續嗣先烈。四及季秋之吉，再歆合宮之嚴。禮成不違，神貺昭荅。益懋仁孝之本，以格天人之和。《樂城集》卷三四。

皇太后答書

皇太后致書于皇帝：秋物豐成，克致粢盛之奉；羣心祇若，式觀職貢之來。內盡純誠，外殫庶物。遂舉多儀之盛，何慚累聖之隆。降福孔多，克勤無斁。《樂城集》卷三四。

皇太妃答書

皇太妃致書于皇帝：絜齋居外，有夙夜之勤；旋辟致恭，盡禮樂之變。仰以報功於上帝，俯以祈福於斯民。及此休成，蓋亦勞止。永膺福祚，以保家邦。《樂城集》卷三四。